





宛陵先生文集目錄卷第二十九

陽翟疑嵩亭

王仲儀寄鬪茶

和王道損風雨

鬪鷓鴣

和道損欲雪

鬪山鵲

和仲文聯句

種藥

答王汝西軒

和持國分題仙藥

送長陵辨師歸寧

和密學流杯亭

和子華陪宴

飲韓仲文家

王汝遺冰蜜梨

王道損遺蜜梨

寄題滁州豐樂亭

和仲文西齋閑夜

荅仲連

和子華飲西軒

和道損喜雪

荅持國遺魴膾

陪觀新水磴

陪泛西湖

和持國石鱗

同諸韓飲曼叔

和仲文西湖野步

送韓奉禮

諸韓來會別

送仲文

送子華

送仲連

送玉汝

玉汝遺橄欖

和王待制出郊

寄題蘇子美滄浪亭

送河東劉運使

和玉汝對月

和玉汝舟中見懷

和訪孔叅處士

二月十四夜霜

送師直上墳

和諸友歸馬上同賦

和子華寄玉版鮓

喜雨

送江陰王判官

送襄陽王龍圖

和持國新植西軒

送師直會稽宰

賦觀西湖新鷺兒

宛陵先生文集卷第二十九

陽翟縣城凝嵩亭

西北望嵩色憶上大室時陟彼已不淺坐此安能  
知今誰絕壁下但見前峯危正與曩未異目存迹  
焉追

王仲儀寄鬪茶

白乳葉家春銖兩直錢萬資之石泉味特以陽芽  
嫩宜言難購多串片大可寸謬為識別人予生固  
無恨

依韻和王道損風雨戲寄

小雪纔過大雪前蕭蕭風雨紙窗穿而今共唱新  
詞飲切莫相邀薄暮天

鬪鷓鴣孫曼叔邀作

脫命秋隼下鳴鬪自為勇爭雄在數粒一敗勢莫  
擁慙將縮袖間懷負默而拱勝且勿苦欣猶驚辱  
與寵

和道損欲雪與家人小兒輩飲

陰雲濃壓野風獵樹高鳴寒禽並枝立頗以見物  
情目前兩稚子為慰豈異鄉欲置一壺酒且獨對  
婦傾

韓持國邀賦鬪山鵲

俗有巧鬪心畜此巧鬪禽搏擊無迅節爪觜自相  
侵胡能知遠人角勝合百金鳳凰安在哉徒此望  
丹岑

依韻和酬韓仲文昆季聯句見謝

淨居堂因  
至其第

子前與道  
損游西湖

冬日晴且暖林塘思淨居往興都未盡遂經韓氏  
廬韓氏兄弟賢各各趨義塗吾儕與之游何異田  
蘇俱經疑反此質學陋慙無餘况茲諸少年高論  
傾國都以及治民術縱橫無所拘又涉方外說於

道曾不殊詩評杜兼李字法褚與虞啜茗豈非好  
吟栗強為娛久馱官局檢聊休體質舒次第極言笑  
左右排圖書終日欣博約貶異正則扶所賴存泛  
愛未以我為愚持歸接士論頗亦類販沽復聯長  
詩來味若飡瓊腴其辭多自損似欲大厥譽顏子  
乃庶幾仲尼稱弗如不馱會遇頻雲龍實相須寂  
和躡麟趾舉步未敢渝

種藥

雲外陽翟山實與嵩步接山中採藥人能自辨苗  
葉當須斲其根以遂素所愜野藜包舊土遠置風

雨捷故本含新芽枯筵帶空莢植雖乖地勢培壅  
得專輒冬誰論臭香春定引蜂蝶豈唯識草木庶  
用補羸茶

答韓六玉汝戲題西軒

吾軒今於水吾居易為足誰與哦其間風牕數竿  
竹雖無泉石清尚不愧茅屋所樂違俗暄此趣大  
已熟

和韓五持國乞分道損山藥之什

不種東陵瓜不利千畦韭山藥數十本帶土移野  
叟故葉萎未醒傷根亦何咎既為君子好豈與騷

人負騷人比畫工丹青出其口欲分攔下齒馳奴  
仍置簾主人可無吝所尚非獨有從茲各勤灌肯  
在園蔬後今雖勝曝蓄畢意資資玉曰人事固已然  
秘方看繫肘

送長陵清辨師歸寧

山房古栢暗近在漢陵邊天供不爲樂母心常所  
懸朝途髮根冷暮野鳥行先子道豈殊衆誰云絕  
世緣

依韻和李密學會流杯亭

園林固足勝景著必人賢將泛杯中物遠分湖水

泉來從百花底轉向衆賓前易醉緣多病陪公愧  
少年

依韻和韓子華陪王舅道損宴集

韓氏兄弟八人

而七人  
在坐

雲低未成雪寒氣已侵席凍醪傾白濁乾果列紫  
赤風微時破面亭敞宜張帟來望野興通古城何  
額額邀射弓鈞開破的翦羽白助中聲喧呼不覺  
屢傾憤醉驚一發功誰許百金易非等將帥能  
聊將賓友適中酒作暴謔心親語多劇吾徒固不  
羈安可限常格去忌無俗流起酌驚臧獲八龍觀

諸韓頭角相戢迫參差玉峯前愛慕不知夕誰嗟  
短景移能使各情釋為賀主人翁賢甥無久隔此  
會舉世稀頻頻奚所惜

飲韓仲文家

飲酒衆所嗜未若朋會樂終日不為荒於時豈多  
作坐客十餘人七子實棣萼杯行發嚴令孰不資  
善謔巧詞劇猱捷辨機如弩彊醉舌強且遲罰觥  
奚屢酌正言訐詭諛簡禮去酬酢迭嘲果與蔬相  
呼花間藥是非不親親笑語何落落夜歸歡有餘  
孩稚扶仍噓

玉汝贈永興冰蜜梨十顆

梨傳真定間其甘曰如蜜君得咸陽中味兼冰作  
簞遺之析朝醒亦以蠲煩疾吾兒勿多嗜不比盤  
中栗

王道損贈永興冰蜜梨四顆

名果出西州霜前競以收老嫌冰慰齒渴愛蜜過  
喉色向瑤盤發甘應蟻酒投仙桃無此比不畏小  
兒偷

寄題滁州豐樂亭

泠泠幽谷泉近在青峰下使君去窮源林外留車



馬一徑穿篠深蔽日復瀟洒行盡逢泓澄影如  
可瀉雲樹陰其傍造物將有假引水開石池結宇  
覆碧瓦乃知愛玩心朝夕未忍捨近移溪上石怪  
古蒼蘚惹芍藥廣陵來山卉雜天冶春禽時相鳴  
賓從不應寡欲問淮南趣還思洛陽社勝事已不  
辜吟觴無倦把

和韓仲文西齋閑夜有懷道損舅及予

冬日每苦短方愛夜漏末積雲寒擁齋徘徊延月  
影獨能懷親友出門見參井是時發清詠筆若天  
驥騁

前此諸韓來飲獨仲連以小兒病不至明  
日仲連有夜坐見懷之什因成荅章

夜與賢豪飲方聞默坐時我斟相樂酒君詠寄來  
詩莫恨殊喧寂真緣篤愛慈何當因雪興過此未  
應遲

奉和子華持國玉汝來飲西軒

我誠官局冷終日事靡枯每耽古人書似與世俗  
闊同道三四人來過慰飢渴迭相陳語言曾未厭  
力咀自中將過脯留飯具麤糲薄酒繼以斟不覺  
寒日沒愚妻方罷沐供飲愧倉卒凍婢昧煎和親

調首忘髡每食各驚顧誰謂不黔突倦僕暇吾薪  
飢馬飽吾秣馬無歸嘶聲僕有顏色活安穩不知  
疲明缸仍爲撥醉言實無次曾未窮本末諸君竟  
相先出口論莫奪復云天地間此能有幾達我聞  
顏汗下恐後謗難遏其間常有言但未見疵獻終  
當輕有若悔目已屢恥莫八信哉群玉林豈得依朽  
枿吾心爲之然收舌如斷割寄音謝豪俊茲蘊只  
圭撮

和道損喜雪

密雪已迎臘隨風來拂巾偏知寒夜屋不管醉歸

人暗積空庭合偷裝衆樹新沃田將望歲堅腐且  
忘貧薄厚曾無意飄揚似有因既能先覆物乃見  
未饒春作陣從天落何功得地均暫欣供一賞惜  
逐馬蹄塵

荅持國遺魴魚皮膾

海魚沙玉皮翦膾金虀醖遠持享佳賓豈用飾寶  
劍予貧食幾稀君愛則已泛終當飯葵藿此味不  
爲欠

與仲文子華陪觀新水碓

湖壩此興磴許俗見仍稀激射聊因勢回環豈息  
機水如崑下過人悟雪中歸坐想韓夫子心應不  
道非

與道損仲文子華陪泛西湖

冰消湖已綠渺渺鴨頭春舩學吳兒刺吟稀楚老  
新對山憐去鳥隔樹識遊人誰念滄江上風柔採  
白蘋

和持國石蘚

石根雲常蒸老蘚密於毯濕翠連澗陰淨綠繞岳  
坎不異泉上芹半茸猶可掣安知山中客遠寄趣

已淡

同諸韓飲曼叔家

富貴豐盤食日可侑清角不與賢者俱飽食何所  
學吾友雖日貧邀賓不辭數質衣爲酒肴出論輕  
管樂其饌精且甘刀几孰親握是時予苦眩引去  
意頗確羸馬雪中歸醉醒誰復較

和仲文西湖野步至新堰二首

泱泱堰根水層層湖上田寒魚猶著底白鷺已飛  
前履惜春泥滑衣從蒞蔓牽偶來成野望歸興自  
留連

潭上水容暖野中寒吹橫行塘人已晚吟步日難  
更凍地坼枯龜斷冰流破鏡王都且不遠樂此林  
泉性

送韓奉禮崇道

將欲侍親去獨要予贈言世風還自有文體不須  
論稍愛春波急微生野岸艱行舟寧覺遠幾日到  
都門

諸韓來會別

諸韓行有日別思更依依獨歎從予少還看似子  
稀呼童聊奏酒洒水為開扉蘇合染裘美雪中闔

闔歸

送仲文

三年不出戶孝行閭井聞近俗遂知化豈非由所  
薰御琴趨國門何必長守墳美哉若君子忠可移  
於君

送子華

識君雖恨晚說詩屢解頤吾徒固難合所合終不  
移冒寒躍馬來且言行有期河上冰始坼輕棹去  
未遲

送仲連

別緒如亂絲欲理還不可却悲嬌女詩寧戀更効  
左是時遠道懷紛紛上歸舸憐君正如此豈任風  
雨倭

送玉汝

談笑去拘忌乃見相與深風騷得往返但見非知  
音明日車馬北豈不動離襟春風靡蕪綠別恨生  
遙岑

玉汝遺橄欖

南國青青果涉冬知始摘雖咀澁難任竟當甘莫  
敵來從萬里外或以苦口擲所投同木瓜欲報無

瓊壁

和王待制出郊馬上口占寄兄損道次韻  
日暖寒郊不起風使君車騎出城中遙知望處思  
兄弟鴻鴈連連下遠空

寄題蘇子美滄浪亭

聞買滄浪水遂作滄浪人置亭滄浪上日與滄浪  
親宜曰滄浪叟老向滄浪濱滄浪何處是洞庭相  
與鄰竹樹種已合魚蟹時可緡春羹芼白菘夏鼎  
烹紫萸黃柑摘霜晚香稻炊玉新行吟招隱詩懶  
戴醉中巾憂患兩都忘還往誰與頻昨得涂陽書

語彼事頗真曩子初去國我勉勿迷津四方不可  
之中土百物淳今子居所樂豈不遠埃塵被髮異  
秦伯結客非春申莫與吳俗尚吳俗多文身蛟龍  
刺兩股未變此遺民讀書本爲道不計賤與貧當  
須化閭里庶使禮義臻

送河東轉運劉察院

塞郡屯師久飛芻始得人權傾擁旄將詔輟繡衣  
臣舊里過京洛辭家渡盟津紫裘蘇合染驄馬玉  
環辰榆莢關頭雨梨花谷口春高車方陟險豐膳  
暫違親山勢北臨岱地雄西隔秦行臺知不遠能

使問安頻

依韻和玉汝對月見懷西軒

坐見沙頭月復怜衣上輝正如從我飲還欲照君  
歸相逐影徒是共嗟歡已非夜深依岸落寒色入  
傷違

依韻和玉汝舟中見懷

遙聞出舟望始愛川原廣春冰未破時旋拉寒篙  
響鳴鴈似相隨遠日聊一仰能知狀物工把筆獨  
見想

同道損持國訪孔叅處士

高盧當大道節士不肯過窮巷獨秉德車馬一何  
多勢力走諛諂禮義服委佗是以被褐人長甘北  
山阿曰今豈有愧漁上有行歌

二月十四夜霜

欣欣東園杏忽值春飛霜粲然彼繁英萎若出沸  
湯既能與之榮而復使之傷向來肅殺時已共百  
卉黃今同草吐心不似草心長天理固難測誰要  
必其常

送謝師直南陽上墳

躍馬清明前行將拜孤壠松吹送悲聲緣纓淚如

湧三歲宰南方奠尊阻親捧山下獨徘徊雨來雲  
蓊蓊

奉和持國曼叔方叔送師直歸馬上同賦  
之作

郊外桃李花赤赤復白白為君歌古曲行子在南  
陌衆人各已歸春風送無跡安知春風送到處花  
當客我病出獨難併請春風適此情無遠近千里  
不能隔

和韓子華寄東華市玉版鮓

客從都下來遠遺東華鮓荷香開新包玉齏識舊

把色絮已可珍味佳寧獨捨莫問魚與龍予非博  
物者

喜雨

冬涉春無雨侵晨忽霽然燕曾知社後雷未發聲  
前細濕林花暗輕霑土脉全看看一百五風勢莫  
狂顛

送王判官之江陰軍幙

易知

往時初渡江頗愛江南美誰知坐卧間思及煙波  
裏絮逐鮎魚繁豉添菹線紫君行語風物到日應  
相似

送王龍圖源叔之襄陽

忽驚車騎臨乃是荊州長登堂語出處陳事猶夢  
想別逾二十年相遇今始兩爵位異禮數齒髮可  
下上但問我何有而獨不愛曩敢告守拙愚此道  
未嘗枉行當至峴山羊公存廟像簫鼓有時莫道  
德其可仰

依韻和持國新植西軒

開地臨廣衢崇崇十餘畝新軒稍偏北治圃亦西  
酉盎中植菡萏水不過升斗小桂未得地驗活徒  
插朽上之幽禽啼下多穴蟻走藥苗雖無補欲比



山中有澆灌同一時萌芽或先後松株不滿尺廊  
廟色已厚稟性久且堅物理豈無偶椽櫓仍未大  
散葉纔八九夏綠與冬青各各自為友吾軒還處  
西脩竹爾後取兩莫論是非但可吟對酒

送師直之會稽宰

其兄在餘姚

天下風物佳莫出吳與越新罷吳官來又隨越舸  
發連宰吳越間皆適蛟鼉窟伯氏復同郡邑境接  
民堡寧將內隔外正似肉附骨姚江遺魚蟹稽山  
奉筍蕨足得相交歡高堂未華髮送子意不盡念  
逐有明月

西湖觀新出我鳥兒道損持國曼叔請予賦之  
春袍畏雷後殼開形已完嫩毛輕染蘗小掌未全  
丹見物初能噫浮波尚怕寒山陰無道士更長換  
應難

宛陵先生文集卷第二十九

宛陵先生文集目錄卷第三十

送李密學亳州  
送樊秀才歸安州

和李密學見懷  
觀理蔬

哭尹師魯  
泛舟和持國

荅持國示詩  
送李轉運移京東

送庭老歸河陽  
詠雙杏

和仲儀楸花  
目昏

送韓太祝求醫  
賦紅雀

持國遺食  
捫虱得蚤

同道損遊西湖  
送上虞孫簿

寄題金州處陰亭

石榴

七夕

同諸韓晚遊西湖

韓玉汝遺澄心紙

和仲儀麝香

和凌霄花

聞玉汝宿城北

夢過三陵

詠扇

送曼叔襄城尉

送吳給事移淮西

李密學寄亳州棗

九月五日夢永叔

尉氏南至京水及人脛

宋平叔郊外見迓

裴如晦赴河陽幕

送子華拜掃

送玉汝宰錢塘

得曾鞏附永叔書

追詠崔氏小園

宋中道快予生女

詠次道宅櫻櫚

詠秤

詠象子華邀賦

和答惠勤上人

答顯忠上人

送韓仲文奉使

送劉司勳奉使

和永叔秋懷見寄

同玉汝謁裴如晦

詠黃木芙蓉

二馬

和許發運詠影

寄題衢州萃賢亭

答楚僧智普

和鴨雛

有覩

目錄終

宛陵先生文集卷第三十

送李密學赴亳州

倦輸關內粟遂請潁川符治績可稱最士民將以  
蘇譙都君命重苦縣祖風殊仙檜留陰在甘棠即  
化敷行舟通遠水候騎溢長衢他日人懷望煙雲  
自滿湖

送樊秀才歸安州

開元有謫仙酒隱向安陸子嘗慕其人文字不拘  
東月下每醉吟落紙輒數幅今當安陸歸白酒村  
中熟一名猶未成雙親淚盈目切莫苦銜盃無心

不擇祿去去煙水間野禽嗥古木聞聲不得名將  
投山舍宿此趣自可嘉非如走塵轂

依韻李密學合流河口見懷

二水交流抱閭井清潭幾曲自淵回已浮畫舸遙  
遙去更愛雙鷺泛泛來

觀理蔬

野薺不堪食蕪菁今正肥夏畦人所病老圃方可  
窺乳雀爭啣蝶鳴鴉各護兒於陵豈復有空學桔  
槔為

哭尹師魯

謫死古來有無如君甚冤文章不世用器業欲誰  
論野鳥災王傳招辭些屈原平生洛陽友零落幾  
人存

泛舟和持國

綠源去未窮夾岸樹濛濛弱蔓低侵水殘芳不隱  
叢浣衣思越婦折筍擬江童薄暮迴舩處潭魚動  
鏡中

欲晚訪韓持國忽道損見過不克往持國

示詩因荅

西雲沉日脚命僕駕我車我車已在庭有客方詣

廬談笑不覺夕雞黍且煩渠重約勿以怪但當摘  
園蔬

送京西轉運李刑部移京東轉運 鈇

列藩環王都遂分東西道統制連別京守臣多碩  
老外臺持權綱才具必美好公今且更踐入用頗  
不早乃令山東粟餉饋歲可保古路趨汶陽長風  
吹綠草

送李庭老歸河陽

五月馳乘車歸心豈畏暑道上多清陰日中不暍  
處函谷自控帶大河無險阻時平獨往還拜壽觴

屢舉

詠雙杏子其核亦然

子核成雙杏將寄同心人定棲鴛鴦魄為物豈無  
因

和王仲儀楸花十二韻

春陽發草木美好一同時桃李雜山櫻紅白開繁  
枝楸英獨步媚淡紫相參差大葉與勁幹簇萼密  
自宜圖出帝宮樹聳向白玉墀高絕不近俗直許  
天人窺今植郡庭中根遠未可移但欣東風來不  
恨和駒遲山禽勿感踏蜂蝶休掇之昔聞韓吏部

為爾作好詩愛陰無織穿就影東西隨公今亦牽  
此端坐曾莫疑

目昏

我目忽病昏白晝若逢霧窺驚隻物雙書輒下筆  
誤來人髣髴是飛鳥朦朧度紜紜孰辨別此已忘  
好惡

送韓八太祝歸京師求醫

少年絜而腴茸茸頰有鬚冒熱跨馬去去去天王  
都借問去何謂就醫將疾驅客曰實誑我健壯其  
非夫敢告固不給但怪所見愚瘠者未必病病者

未必癯天馬不着肉日走萬里途山熊豈無膏養  
體唯恐痛滯結在於內安得形肌膚厥貌雖美好  
厥疾勿須更療之欲其漸熾之非愛軀此行不飲  
別安得持酒壺

記春水多紅雀傳云自新羅而至道損得  
之請余賦

赤羽異蒿鷄來自東夷國群集成臯間翩翩皆一  
色舉臆發朱砂為瑞應火德穿屋彼非類啄粟慙  
與食清聲殊啁啾所畜每陋逼應當放之去重展  
萬里翼

持國遺食

乞食非為貧妻病妾且死晨爨不爨釜朝飯亦輟  
匕遺我我所恤食我所耻我耻曾我求我恤寧  
我止應之豈在豐赴義實未鄙漂母殊下鄉為惠  
得終始

捫虱得蚤

茲日頗所愜捫虱反得蚤去惡雖未殊快意乃為  
好物敗誰可必鈍老而狡夫穴蟻不嚙人其命常  
自保

同道損世則元輔游西湖於卞氏借雙鶴

以觀

塘蒲蔭綠水菡萏艷脩渚想像華亭野但欠鳴鶴  
侶同來三四人趣尚頗相與思見此清禽無能覲  
翔羽城隅有大第世本官吳楚嘗同太湖石不惜  
持金取欲作園林勝園林寧暇覩今當問其家借  
賞無吾拒果亦致之來奮毛如喜舞雖生滄海心  
翅重不得舉還爾稻粱貪崇丘在何所

送上虞孫主簿

稽山參雲深剡水與天碧行將啼鳥親翫不游鱗  
隔況世住新安又嘗為粵客風物知所諳窮幽梯



翠壁

寄題金州孫御史處陰亭

有形則有影畏影當念形日月難久晦處陰乃暫  
停光照不復離疾走何所寧當是謂尼父我輩烏  
忍聽結廬雖可託夜燭亦熒熒直躬觀罔兩將此  
同醉醒

石榴

榴枝苦多雨過熟圻已半秋雷石罌破曉日丹砂  
爛任從雕俎薦豈待霜刀判張騫西使時筠簪同  
歸漢

七夕

古來傳織女七夕渡明河巧意世爭乞神光誰見  
過隔年期已拙舊俗驗方訛五色金盤果蜘蛛浪  
作窠

同諸韓及孫曼叔晚遊西湖三首

晚日城頭落輕鞍巢下涼野蜂啣水沫舟子剥菱  
黃木老識秋氣徑幽聞草香幅巾聊去檢不作楚  
人狂

爍電未成雨涼風先入衣青天忽開影紅日尚餘  
暉蛺蝶作團起蜻蜒相戴飛嘲謔不覺夕跨馬月

中歸

舟中演滿意不淺却坐林塘景欲昏翠色蜻蜒立  
菱蘩青絲騾裊秣城根

韓玉汝遺澄心紙二軸初得此物歐陽永  
叔又得於宋次道又得於君伯氏子華今  
則四矣

三得澄心紙吾嘗再有詩粗能條本末不復語興  
衰堪入右軍跡慙無幼婦辭君家兄弟意將此比  
烏絲

和王仲儀二首

麝香

游伏栢林下食栢遂生香空知噬臍患豈有周身  
防赤豹以尾死猛虎以睛喪儻或益於用捐軀是  
其常

凌霄花

草木不解行隨生自有理觀此引蔓柔必憑高樹  
起氣類固未合縈纏豈由已仰見蒼虬枝上發彤  
霞蘂層霄不易凌樵斧誰家子一日摧作薪此物  
當共委

七月二十一夜聞韓玉汝宿城北馬鋪

暗樹秋風擺葉鳴  
桃枝竹簟冷逾清  
孤燈淡淡短  
亭客半夜蕭蕭聞雨聲

夢過三陵

夢過漢陵間  
秋風石馬閑  
當年侍臣淚  
泣盡向三山

詠扇

翦紉成薄質  
誰將擬月輪  
閔竭夏后德  
同我天正仁  
及至為時用  
豈必美畫人  
何憂秋風來  
退藏保其真

送曼叔襄城尉

昔君乘紫騮  
來獵荒城下  
復乘紫騮去  
不逢亭長罵  
溪風欲涉時  
山雪獨歸夜  
此趣信所諧  
羈官莫悲吒

送吳給事自許昌移淮西

直道昔參輔  
獨將天下憂  
忠言悟明主  
退請拜諸侯  
坐閣政方舉  
移藩心所求  
蔡人迎且喜  
許俗愛難留  
夾路車徒盛  
分墻禾黍秋  
穆陵無夜閉  
仁化自公修

亳州李密學寄御棗一篋

沛譙有鉅棗  
味甘蜜相差  
其赤如君心  
其大如玉

瓜嘗貢趨國門豈及貧儒家今見待士意下異盧  
仝茶食之無馱飲詠德曾未涯

九月五日夢歐陽永叔

朝鏡惡白髮夕夢對故人常恨道路隔忽喜顏色  
親相笑勿問年青銅早傷神雞喙天欲白向者猶  
疑真

自尉氏南至京皆水及人脛

陸行畏水深舟行畏水淺河流去時閣涂潦歸時  
踐事與時相違我慙行處蹇人生莫為客為客此  
安免

九月十六日自許昌迴至京師胥平叔宋  
中道迂于郊外

今日至國門二子來迎我適遇信陵塚塚棘秋葉  
隨翩翩隨人飛拂馬右或左謂此獨無情亦與吾  
意可

裴如晦赴河陽幕

喙風一夜動作雪欲愁客客莫苦嗟行農望明年  
麥方來笑語同又是閔河隔主人賢且智不待子  
所畫

送韓子華十月拜掃

白露已變霜孝心竟悲惻薦衣如念存拜墮不遑息  
帶劔蓬池外兼程困馬力禮畢便當還於誠乃為得

送韓六玉汝宰錢塘

子嘗訪林  
遊湖上

頃尋高士廬正值浸湖雪雪中千萬峯參差縣前  
列僧居或隱見岸樹隨曲折驚鳥如避人遠向寒  
煙滅潛希為子男儻得遂踈拙今逾二十年志願  
徒切切方聞落君手與我曾未別景多詩莫窮歸  
載馱車轍

得曾鞏秀才所附滁州歐陽永叔書答意

客從淮上來往問故人信袖銜藤紙書題字遠已

認既喜開其封固覺減吾吝新詩不作寄乃見子  
所慎向來能如今豈有得觀豐南方歲苦熱生蝗  
復饑饉憂心日自勞霜髮應滿鬢知予欲東歸曉  
夕目不瞬貧難久待之薄祿藉霑潤雖為委吏冗  
亦自甘以進相望未得親終朝如抱疔

追詠崔奉禮小園

前此訪君時已觀堂宇邃安知中屏開自有幽林  
致花塞崑桂紅石擘雲根翠正當秋風來不見搖  
落意日得吟其間何須去為吏

宋中道快我生女

爾嘗喜詛予生女竟勿怪今遂如爾口是宜為爾  
快亦既以言酬固且殊眦睚慰情何必男茲語當  
自戒

詠宋中道宅樓閣

青青樓閣樹散葉如車輪擁攘交紫髯歲剥豈非  
仁用以覆雕輿何憚尅厥身今植公侯第愛惜知  
幾春完之固不長只與齋本均幸當勅園吏披割  
見日新是能去窘束始得物理親

詠秤

聖人防爭心衡權為之設後世失其平有星徒爾

列物物尚可欺銖銖不須別將淳天下民安得必  
毀折

詠象韓子華邀賦

軀大力無用遠物賞馴柔食芻與飲水百倍於馬  
牛猶能絡金羈不可伏車輶蒼舒曾智秤千鈞空  
豎舟

依韻答惠勤上人

釋子本樂靜宜不事物牽我慙姑蘇守復賞村山  
然三歲與之別其學已增前忽此有來贈老拙謬  
耽研

卷三十一  
十一  
谷顯忠上人

驅馬傍馳道歸自許西偏高車非舊貴立避槐樹  
邊心雖欲往謁僕餒行不前是甘處窮巷晨笑微  
生煙儻有好事者扣門與留連或出袖中詩語熟  
氣頗全曾不類緇褐始可令勉旃京師百許寺知  
幾相差肩

送韓仲文奉使

往使兗奴國持節豈辭遙朔北正苦寒風汝與雪  
飄燕山何處是漢銘應已銷前車渡冰河後騎鳴  
金鑣行行至穹廬尊我不敢置玉爵親獻酬名裘

進狐貂禮成復命日苑柳舒楊條

送劉司勳奉使

授命出絕域北至單于庭駟鳴沙磧遙馬倦朔雪  
零幽州古道上胡笳應夜聽嘗聞昔時語南看北  
辰星使回儻可記乃得驗天形

依韻和歐陽永叔秋懷擬孟郊體見寄二首

我居西北地秋無東南風木脫不塞望高臺空九  
重音塵安可得鴻鴈鳴霜中日看紫苔生乃見三  
經窮一聞離騷篇寫盡楚客曾曾懷如寶匣夜夜  
吼生銅

秋思公何高堆積自崿崿出為悲秋辭萬仞見孤  
聳念我老於詩我髮實種種而後傷故人故人多  
作塚陰風夜木嗥窻窻聞鬼悚獨我忘形骸百事  
乃纖冗不眠霜月上霜月如可捧

裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚  
戾不顧遂登堂有馬堂下繫辨詐大呼卿稍應西  
屋際逡巡冠帶出青綬何曳曳有似縮殼龜藏頭  
非得計況與二三子交分久已締怨爾避客尤新  
還復新婿

詠王宗說園黃木芙蓉

水中兼木末相擬有嘉花玉蘂圻蒸粟金房落  
晚霞涉江從楚女采菊聽陶家事與離騷異吾將  
塞以誇

二馬

舊馬十年跨老劣多緩行新駒三萬錢頗愛舉蹄  
輕不使異芻秣均養存其情君門趨早朝風勁力  
已生

依韻和發運許主客詠影

蒼影陶潛興長吟為我聽與之相遇日曾不異於



形動靜隨生趣存藏委曜靈莊周疾走意推本  
置諸銘

寄題周源貞外衢州萃賢亭

昨朝江南客語子川亭上有時飛雨來不見前山  
青卉萼人未識鳥響日可聽既將遲賢者無使童  
僕局

谷楚僧智普始與吳僧顯忠來過今見二

人詩進於舊矣

我初見子時子作楚人語復與吳客來音俱變齊  
魯乃知久處益薰猶可同舉更當富於學茲言

聊以補

鴨雛

春鴨日浮波羽冷難伏卵嘗因雞抱時託以雞窠  
暖三旬殼既圻乳毛寒脰短雞寧辨其雛翅擁情  
欸欸一日向水涯所稟殊未斷泛然去中流雞呼  
心憲憲人之苟異懷負義不足算有志在養毓勿  
論報德限

有覩十一月七日

來恨我馬遲去恨我馬疾馬蹄塵作雲已隔粲然  
質時時顧且遙亂緒如有失

宛陵先生文集卷第三十

宛陵先生文集目錄卷第三十一

杜挺之贈端硯

謝冲卿示持國詩卷

重修孔子廟記

席中賦葡萄

夜聽鄰家唱

和次道金橘

送韓持國婦許昌

送韓持國

遲月

風笛

霜鍾

鳴琴

和光道屏中六鶴

聞子華見訪

送丹陽宰李國博

食齋

甘陵亂

夜飲席上賦松子

送李殿丞歸河陽 送王寺丞歸南京

李審言學士遺金波酒

對雪憶訪林逋 元日朝

荅祖擇之遺墨 對殘雪懷永叔

和中道元夕 寄題碧雲堂

李國博遺薑茗 送臨江胥令

寄題滁州醉翁亭 夜夢

賜緋魚 和荅韓子華餉子魚

和荅韓奉禮餉荔枝 張氏納婦

酌別謝判官兼懷永叔 京師延慶曆八年春  
盡夏五月楚州道中

和永叔聞百舌 送陶太博廣信倅

荅王太祝卷 雨賦

送張太博袁州倅 和宋中道夜雨

書裴如晦集後 見胥平叔

宣麻 朧月

兵 泥

聞韓仲文使歸 未晴

夜陰 夜晴

古鑑 索駝

庭老許遺結絲勒帛

貧

行僧

目錄終

宛陵先生文集卷第三十一

杜挺之贈端溪圓硯

雪壓古寺深中有臥病客訪之語久清飢馬齧庭  
栢按頭蠻溪硯其狀若圓璧指此欲為贈而將助  
吟席非意予敢貪既拒頗不懌大出楮中有素許當  
自擇強持慰勤心歸以示朋戚哂曰豈其然為汲  
寒泉滌滌彼偽飾物紙乾見頑石清晨走髯奴無  
厭願求易拜賜遂如初明月懷吞蝕微分鸚目瑩  
尚漬墨花碧詞答謂我愚悔復料已逆明日未央  
朝執手笑啞啞

吳冲卿示和韓持國詩一卷輒以為謝

葉公所好者熟已識頭角一日真物來駭汗沛且  
渥我初見韓子蜿蜒噴雷電子復蛟龍文氣象不  
可捉畏懷但驚顧得與前事較

新息重修孔子廟記

新息古邑也自漢以來幾因亂而孔子之廟歲享  
不絕于今雖邑宰有賢否祀典繫國家也儻不賢  
屋隳不葺有矣祀其廢諸慶曆七年清河張君伸  
為是邑始勤於治民謹於條約恪於事上既而民  
信訟且簡乃脩孔子祠及祭器予未知君之果學

耶學而果知道耶以斯舉則君似有本者學者未  
必信奉如之嗚呼孔子之道與天地久與日月昭  
一郡一邑之廟不足以光顯厥德報厥功也略究  
為郡邑之人少誦其書長就其藝遂得其祿忍負  
不為一出口之勞完其廟至使瓦墮簷風雨壞桶  
甃缺階塵昏像犬豕穴墻垣往來其間哉新之無  
是患庶幾賢已然則苟因為利廣爾官俾不肖有  
說非予望於君也况邑隸蔡守吳公輔臣大儒名  
重天下聞君能是得不樂耶予思昔忝邑時見邑  
多不本朝廷祭法往往用巫祝於傍曰牛馬其肥

癘疫其銷穀麥其豐清悖為甚予即革之君觀有  
若是者當改為以從者式云

范景仁席中賦葡萄酒

朱盤何纍纍紫乳封霜厚今為馬谷繁昔釀梁州  
酒乃知西土珍漢使傳應久

夜聽鄰家唱

夜中未成寐鄰歌聞所稀想像朱脣動髮髻染塵  
飛悞節應偷笑竊聽起披衣披衣曲已終窻月存  
餘暉

宋次道得廣南金橘為餉且有詩因和酬

越橘如金丸爛然已盈篋誰傳嶺外信尚帶霜前  
葉莫嫌道路遠得與樽俎接主人無吝心懷歸予  
敢輒

李廷老席上送韓持國歸許昌

得早字

馬蹄踐霜華遊客歸何早重裘不畏寒况復非遠  
道誰言未顧期登第髮如葆解裝喜可知月下金  
壺倒

送韓持國

曰予非才敏乃與世寡游三四洛陽友過半已成  
丘晚節五六人文行皆潔修韓氏棣萼盛於我為

薰猶君比衆最篤我唱君非酬昔我竹軒下破窓  
風颭颭君時不厭過逍遙談未休頗為俗士憎恬  
不防吝尤邇來我還都君亦辭舊州舊州君所隱  
安得此夕留雲晴命駕歸使我生悲愁誰見溪水  
上定更不驚鷗

遲月

遲月月已上清光在高木未能照我庭團團隔東屋  
風笛

既殊出塞聲還非江上聽夜吹送悠揚高樓月方  
迥

霜鍾

昔向寒溪臥遠寺撞白雲今也趨早朝殘月馬上  
聞

鳴琴

雖傳古人聲不識古人意古人今已遠悲哉廣陵  
思

和曹光道詠直廬屏中六鶴

漢家為瑞雙黃鵠只道飛翻太液池不似雲屏六  
畫鶴帝宮深處有人知

晚歸聞韓子華見訪

門外多車騎後迹亂前蹤誰識此來過塵蹄重復  
重歸有野僕言恨不故人逢豈無肴酒設所向乖  
所從未能一往見懶拙其必容

送丹陽新守李國博歸洪州寬

蔡水冬不枯唯愁夜水結歸舩及暖下窮臘未飛  
雪淮潁地漸偏川上雲常泄幾日接春波南風楚  
江徹拜親懷郡章予慕嗟才劣

食齋

世羞食齋貧食齋我所甘適見採齋人自出國門  
南土蠹瘦鐵刀霜亂青竹籃携持入凍地挑以根

葉參手龜不自飽食此尚可慙肥羔朱尾魚腥羶徒  
爾貪

甘陵亂

甘陵兵亂百物灰火光屬天聲如雷雷聲三日屋  
瓦摧殺人不問嬰與孩守官迸走藏浮埃後日稍  
稍官軍來圍城幾匝如重鉞萬甲雪色停皚皚孰  
敢專輒但取裁黃土始堅難速頽

夜飲席上賦松子

風松有霜子吹落幽人庭幽人畏狼籍日掃出巖  
扃誰將稱遠物乃信涉滄溟



送李審言殿丞歸河陽

大河冬合時上可馳車馬  
歸子從橋安黃流在冰  
下况命使於家其美世為寡  
是宜飭以行慰此懷  
慕者

送王宗說寺丞歸南京

晏歲欲飛雪滿天含凍雲  
犯寒單騎速獵吹紫裘  
薰庭鵲還先喜池鴻去始聞  
公應問貧賤善說莫  
如君

李審言將歸河陽值雪遺金波酒

朔吹卷天吼遠郊無鳥飛  
忽驚開戶白昨夜打窓  
微闇巷我方懶關山君獨  
歸翻能寄醇酎為此解  
寒威

對雪憶往歲錢塘西湖訪林逋三首

昔乘野艇向湖上泊岸去  
尋高士初折竹壓籬曾  
礙過却穿松下到茅廬

旋燒枯栗衣猶濕去愛峯  
前有徑開日暮更寒歸  
欲懶無端撩亂入船來

樵童野犬迎人後山葛棠  
梨案酒時不畏尖風吹  
入牖更教床畔覓鷓夷

元日朝

萬國諸侯振玉珂踏雲朝會雪初過欲聞鳳管天  
邊度數聽雞人樓上歌放仗旌旗方便亞迴頭宮  
闕更嗟峨謬陪王屬曾何補泛泛慙同上下波

答祖擇之遺新羅墨

海上老松死霹靂燒瘦龍胡人犀皮膠團煤煙膏  
濃色奪陽為翅來涉溟渤重君獲乃為贈我謬蟲  
鳥蹤且作異土玩不愧西域節

對殘雪懷歐陽永叔

窮臘一尺雪跨春氣逾嚴童僕苦病瘵庭戶無與  
杳日消夜復凍霰積泥相醜懶出獨懷遠何由寄

江帆

寄題時上人碧雲堂

望望佳人來未來雲已暮當時千里恨不獨看雲  
故何此啓虛堂定知吟秀句還會古人心古人非

特賦

和宋中道元夕二首

結山當衢面九門華燈滿國月半昏春泥踏盡游  
人繁鳴蹕下天歌吹喧深坊靜曲走車轅爭前闢  
盛亡卑尊靚粧屨服何柔温交觀互視各吐吞磨  
肩一過難久存眼尾獲笑迷精魂貂裘比比王侯

孫夜闌鞍馬相馳奔

春風來解吹殘雪燈燭迎陽萬戶燃竟看繁星在  
平地不妨明月滿中天赭袍已向端門御仙曲初  
聞法部傳車馬不閑通曙色康莊時見拾珠鈿

李國博遺浙薑建茗

吳薑漬吳糟越茗苞越瘴咀辛聊案盃啜味可奴  
酪但拜故人貺何言為物薄我心易厭足不比填  
窮壑

送臨江胥令

初從桃源還却向竟陵去今作中州官山水不曾

飲且當傳竹枝莫學乘籃輦雲木杜鵑啼千崑響  
行處

寄題滁州醉翁亭

琅琊谷口泉分流漾山翠使君愛泉清每來泉上  
醉醉纓濯潺湲醉吟異憔悴日暮使君歸野老紛  
紛至但留山鳥啼與伴松間吹借問結廬何使君  
游息地借問醉者何使君閑適意借問鑄者何使  
君自為記使君能若此吾詩不言刺

戊子正月二十六日夜夢

自我再婚來二年不入夢昨宵見顏色中夕生悲

痛暗燈露微明寐寐照梁棟無端打窓雪更被狂  
風送

賜緋魚

蹉跎四十七腰間始懸魚茜袍雖可貴髮短齒已  
踈兒女眼未識競來牽人裾不知外朝衆君恩慙  
有餘

和答韓子華餉子魚

南方海物難具名子魚珍美無與并完鱗全乙異  
臭腥素盞漬曝生花輕其頭戢戢筠篋盈出自通  
印時所評遠涉川陸來都城親賓交遺已見情食

指嘗動吾竊驚果獲異味亦足明

和答韓奉禮餉荔枝

韓盛人所希四海饋名物韓復未踈予分珍曾不  
一莆陽荔子乾皺殼紅金密存甘尚可嘉本味固  
已失遙思海樹繁帶露摘初日安得穆王駿能置  
萬里疾

閏正月二日夜張氏納婦 太素子

婚姻貴及時周有標梅詩雪後花將發人歸室且  
宜坐中傳漏鼓戶外轉星旗環佩遙聞出當脩廟  
見儀

酌別謝通微判官兼懷歐陽永叔

識君童稚時而今君齒壯不見二十年顏貌已非  
向親戚多零落欲語還悲愴更問平生交久從滁  
水上君又滁水歸寄音傾桂釀儻復二十年吾馬  
保無恙

和永叔郡齋聞百舌

響舌能令百鳥羞聽時丹杏發山郵春雲不定雨  
來急濕翅蒼茫高樹頭

送陶太博通判廣信軍

平時易水頭不復起邊愁壯士去來久寒波空自

流臨塘遺鷺羽隔戍見羶裘半似江南美軍和贖  
宴游

答王太祝卷整

朝迴泥塗不可出飢馬倦僕驅之頑閉門獨與古  
人語黃卷未終聞扣關賢哉公族自來顧詩袖大  
篇令我刪珠光玉瑩絕瑕類強欲指擿徒羞顏自  
同培塿最淺狹安得與子論丘山

雨賦

春雨之至兮風呵而雲導在上為膏在塗為淖被  
末漸本潤萬物者歟施及天下不收報者歟入波

而隨流因積而成潦專好而失道者歟壞瓦漏屋  
蒸菌出水過而為酷者歟朝使人愁夜使鬼哭迷  
而不知復者歟將告之雨雨無聽也將告之天天  
且復也窮居知命是何病也噫

送張太博通判袁州

君非身尤謫南州南方尚鬼其俗媮蛇為鄰虎為  
陳丹茅苦竹深幽幽邑人祠鬼拜古樹竹杯一仰  
來烹牛牛死齧懼常不幸誰得禁止專鋤鉤借曰  
未信君且往民將語怪君聽不仰山頭有行舟

依韻和宋中道雨夜

暗驚料峭寒春雲兼春雨知勝早朝人閑眠不開  
戶丘壑豈無容泥塗還自取誰吟何遜詩不覺逢  
逢鼓

讀裴如晦萬里集書其後

君自萬里迴遂成萬里集其詩二百篇文字必已  
立定應侔前人未嘗有蹈襲古溪鑿鐵刀出塚土  
花澁誰將飾以玉鐔上光熠熠宋子序其端精悍  
孰鉗繫搜新造空蒙俗眼不得入示予要賦之短  
戈慙後執

見胥平林

歷君門兮九重雲黝黝兮欲雨隱翠幕兮觀予心  
眷眷兮木語

宣麻

彬美下一國會無相印酬莫驚除拜峻自是戰功  
優壯士頗知勇諸儒方貴謀淮西封亦薄裴度死  
生羞

隴月

夜晴初見月雲薄未分明高樹尚無影遠鴻時有  
聲下階嫌履濕閉戶認苔生寂寂墻陰暝更長已  
漸傾

兵

太平無戰陣漢卒久生驕金甲不曾探犀弓應自  
調嗟為燎原火終作覆巢巢若使威刑立三軍豈  
敢囂

泥

一夜添春雨中衢長舊泥履粘憂折齒馬滑畏顛  
蹄去啄從江鶴相呼任竹雞朝來放朝請始與逸  
人齊

聞韓仲文使歸

傳道使車迴柳條黃未開曉寒非絕漠春色近章

臺名馬北方至賓鴻南國來明朝齋被見天子始  
稱才

未晴

未晴初止雨蒸潤尚侵衣缺月如羞出荒雲不有  
歸杏花朱欲綻梅萼雪將稀遠鴈來何急衝風濕  
翅飛

夜陰

月色明還暗雲寒散復濃古堂移暍暍積霧合蛟  
龍濕菌飛螢出蒼苔上朽重獨吟嗟向老氣遊覺  
偏慵

夜晴

新晴月正明頻聽夜鳥驚未向高枝穩時為繞樹  
聲群飛自紛泊衆鳥不屏營躁靜於焉見誰能度  
物情

古鑑

古鑑得荒塚土花全未磨背菱尖尚在臯獸角微  
訛月暗蝦蟇蝕塵昏魍魎過但令光彩發表裏是  
山河

橐駝

鳴駝出西域銜尾自連連漢驛凌雲去胡人踏雪



牽常時識風候過磧辨沙泉老覺肉封側猶蒙錦  
帕鮮

李庭老許遺結絲勒帛

紉絲作長帶正勝茱萸紋冉冉仍垂緋  
綵綵自有薰鮮華非稱我修飾未如君曾不日來取賢哉知  
禮云

貧

生甘類原憲死不學陶朱但樂詩書在未憂鍾鼎  
無恥隨波上下難免鬼歔歔陋巷曲肱者終朝還  
似愚

行僧

風衣何揭揭有若瓠葉翻塵土不遠去白雲藏石  
門

三

